



Ur arretik, Ur gardenera

2011ko apirilean plazaratua





Ur edangarriaren inguruan

 aldubiak, Aralar inguruan dagoen herri txiki bat izanik, ez du sekula ur faltarik izan inguruan. Horren lekuko diran han-hemenka ditugun hainbat iturri eta erreka. Baina herri-gunean zer?

1950eko hamarkadan egin zen lehen ur-ekartzea. Ondoren, 1965 inguruan, 2.a eta garrantzitsuenetakoa: Arkakatik ura hartu (9l/s), Goskindin gordailua egin eta herri-guneko etxeetan nahiko ura jarri zena.

Herri-gunea handituz joan zen heinean, beste hainbat lekutatik ere ura hartu beharra zegoela ikusi zen. Eta behar horri erantzuteko, 1970. hamarkadan hainbat iturri (3l/s) hartu ziren berriz ere Arkakan. Harrezkero, herri-gunean behinik behin, zaldibitarrok ez dugu ur faltarik sumatu.

Urte askotan era horretan ibili ondoren, herrian zeuden hainbat gabeziari erantzun beharra etorri zen, zenbait baserri eta auzotan zegoen gabeziari, esate baterako.

Gaia aztertu ondoren, eta baserri eta auzo asko altu gelditzen zirela ikusita, 1995. urtean berrikuntza berri bati ekin zitzaion. Aukera ezberdinak aztertu ziren, kontsorzioan sartu, udalak egin obra... Zenbaki pila bat mahai gainean jarri, eta mila bilera egin ondoren, udalak, aho batez, obrak berak egitea erabaki zuen. Obra horiek gauzatu ahal izateko inongo dirulaguntzarik jaso ez zuenez, mailegu batzuk eskatu behar izan zituen. Funtsean, proiektu horrek, Deposituetatik ura hartu (3l/s CAF enpresarekin hitzartua), hiru gordailu berri (Olakosai, Urtsularre eta Gorriñe) egin, eta herri-gunearen ur hornidura hobetzeaz gain, Urreta Kale, Arruegi, Urtsuerreka, Olaeta, Aiestaran erreka eta Egileor auzoei ur arazoa konpontzea zuen helburu. 1998. urtean ekin zitzaion proiektuaren lehen faseari, hau da, Deposituetatik ura hartu, hiru gordailuak egin, eta Egileor, Olaeta eta Urretakale auzoei ura eman zitzaien. Fase horren kostua 600.000€ ingurukoa izan zen. 2000. urtean, Deposituetatik hartzen zen urak kalitatearen aldetik baldintza guztiak betetzen ez zituela ikusita, 2. Faseari ekin zitzaion. Fase horretan, Osinberdetik zuzenean hartu, eta Arruegi eta Urtsuerreka auzoei jarri zitzaien ura. Horrek, 150.000€ inguruko kostua izan zuen. Azken urte hauetan ere obra dezente egin da herrian: Aiestaran erreka auzoko lehen fasea, kale nagusia berritzea (estolderia berria)... Era berean, martxan da dagoeneko Aiestaran erreka auzoan falta diren etxeetan ura jartzeko proiektua. Guzti hori ikusita, honako hau esan dezakegu:

1. Une honetan, Zaldibiak, edateko duen ura BEREa duela, instalazio berrituak dituela, eta, gainera, herri-gune eta baserri guztietara herriko ura iristen dela.
2. Obra horiek guztiak aurrera eramateko udalak eskatu zituen 2 maila-egutako bat, 3 urte barru ordainduta egongo dela, eta bestea, 5 urte barru ordainduko duela.

Ur zikinaren inguruan



ur zikinei dagokienez, berriz, beste kontu batzuk ditugu Zaldibian. 1979. urtean

herri-guneko estolderia eta araztegi berria (Arotxanea inguruan) egin ziren herrian. Araztegi horrek taxuz bete zuen bere egitekoa urte batzuetan, baina azken urte hauetan, mantentze ezagatik edo beste arrazoiren bat dela medio, ez dabil eta ur zikinak errekarra joaten dira zuzenean. Egoera kaxkar horren ondorioz, azken urte hauetan 8.000€ inguruko isuna ordaintzen du urtean udalak. Hori dela eta, eta egoerari irtenbide egoki bat emate aldera, hainbat hausnarketa egin eta bi aukera jarri ziren mahai gainean:

1. Legorretan Ur Partzuergoak duen araztegiara bideratu.
2. Araztegi propioa berriro martxan jarri.



Bi aukera horiek planteatu zirenean, 2006. urtean, hain zuzen ere, 2. aukera ez zen aztertu ere egin, eta 1. aukera ematen zen aukera bakartzat. Hori aurrera eraman ahal izateko, berriz, bi planteamendu egin ziren:

1. **Plan integrala izenekoan sartzea.** Horrek, honako hau ekarriko zion Zaldibiako herriari: Zaldibiako ur guztiaren gestioa Ur Partzuergoaren esku geratzea, uraren prezioa, mantentze lanak, obra berriak, kobratzeak... Udalak ez zuen partzuergoan sartzeko sarrera tasarik (kanona) ordaindu beharrik izango, baina, herriak azpiegitura guztia (ur zikinen estolderia, edangarriena, 4 gordailuak...) Partzuergoari eman beharko zion. Bada zerbait! Ez zen onartu, ez horixe!.
2. **Ur zikinekin bakarrik sartzea.** Egoera horretan edateko uraren gestio guztia herritarren esku gelditzen zen eta ur zikinak Partzuergoak kudeatuko zituen. Egoera hori aurre egiteko, udalak Partzuergoari 245.000€ (kanona) ordaindu behar zion azpiegitura tasatzat. Eta hori ere ez zen onartu.

Egoera konpondu eta irtenbide bat bilatze aldera, azterketa bat egitea erabaki zen zenbait gairen inguruan: ur zikinen sarea aztertu, araztegi propioa egin, mantentze kosteak... 2010. urterako burutu zen azterketa hori, eta bertan garbi ikusi zen egokiena ur zikinak Legorretako araztegiara bideratzea izango zela, nahiz eta jakin hori kaltegarria izango zela errekarantz, ur gutxiago joango bait zen Gaintzako bidegurutzetik aurrera. Gaintzako ur zikinak Zaldibiako errekarra bideratu dituztela aprobetxatuz, Foru Aldundiarekin eta Ur Partzuergoarekin hainbat bilera egin ondoren, ondorengo adostu du Zaldibiako Udalak:

- Zaldibitarrok Ur Partzuergoan sartzen gara, baina ur zikinekin bakarrik.
- Zaldibiako Udalak ez du orain arteko azpiegitura tasarik ordaindu behar. (285.000€ inguru.). Sartu ondoren, kanon hori, gutxi gora behera 2023 urtera arte ordaintzen jarraitu beharko da.
- Ur zikinak garbitzen hasten direnean, eta gaur egungo datuak kontutan izanda, kanona 27.000 € kostatuko da eta garbiketa 88.000 €, urtean guztira 115.000€ kostatuko zaigu, dena den neurketak egin beharko dira.
- Zaldibiako Udalak ur zikinen sare nagusia debalde ematen dio Ur Partzuergoari, hark kudeatu dezan.
- Ur Partzuergoak, ez dauka Zaldibia eta Gaintzako bidegurutze arteko estolderia berria egin beharrik Gaintzako ur zikinak bideratzeko, azterketaren emaitzak kontutan hartuta dagoena nahikoa delako eta egoera onean dagoelako.
- Ur Partzuergoak eta Foru Aldundiak bukatuko dute falta den estolderia zatia.

Beraz, une honetan honela dago Zaldibiako ur zerbitzuaren egoera: ur edangarria etxe guztietara jarrita eta **gestioa herriaren esku, eta ur zikinen gestioa Gipuzkoako Ur Partzuergoaren esku.**

Denon artean eraiki dezagun herria

Arau subsidiarioak

Une honetan, Zaldibiako arau subsidiarioak lantzen ari direla aprobetxatuz, gaiaren inguruan herritarrek zein iritzi duten jakiteko duela zenbait hilabete inkesta bat egin zen herrian. 50 bat lagunek bete zuten inkesta.

Bertan egiten zen galdera bati, *Nolako Zaldibia nahi zenuke aurrerantzean?* Emandako erantzunak irakurri ondoren, garbi ikusten da gehiengo batek 1.500etik 2.000 biztanle inguruko herria nahi duela. Beraz, gutxi gora behera orain den modukoa, hazkunde izugarririk gabea.

Beste galdera garrantzitsuenetakoa bat industria gunei buruzkoa izan zen, eta emandako erantzunak kontutan hartuta, ez da industria gunek handitzeko beharrik ikusten, daudenak osatuta nahikoa izango litzateke.

Nolako Udaletxea nahi zenuke?, galderari erantzunez, zerbitzu guztiak (udaletxea, kultura etxea, bake epaitegia...) bateratuko zituen beheko solairua eta bi pisuko eraikuntza bat jotzen zuen egokiena gehiengo batek, ikusi egin beharko da nola gauzatu. Aipatutako galdera horietaz aparte, beste hainbat atal ere ukitu ziren inkesta horretan, baina atera dugun ondorio garrantzitsuena zera da: zenbait arazori irtenbidea emate aldera, hala nola, txabolak, baserri lurak, etxe babestuak... herritarrok arau subsidiarioei bultzada bat ematea eta ahal den azkarren amaitzea nahi dugula.



Etxebizitzak

Goian aipatutako inkesta kontuan izanda, datozen 4 urteetarako, (edo gehiagorako ere) orain eraikitzen ari diren etxebizitzek gain, laster egiten hasiko diren Ibar-guren azpi 2. fasekoak, Beheko Zelaia, Ermentari, eta abarrekin, nahikoa dela pentsatzen dugu, aurrera begira ez da zeregin horretarako lur zoru gehiago izendatzea ikusten.

Ibar-guren azpiko 2. faseari buruz aipatzekoa da hasera batean 52 etxebizitza egitea aurreikusten bazen ere, azkenean 72 izango dira. Aprobetxamendua, hau da, altuera eta azalera mantendu egin dira, baina azpian aurreikusita zeuden lokal komertzialak etxebizitza bihurtzen dira eta etxebizitzaren neurria ere aldatu egiten da.

Aldaketa horren truke, eraiki behar diren etxebizitzetatik 29 tasatuak izango dira, promotoreak urbanizazioa hileriraino luzatzeko konpromisoa hartu du, eta herri-gunearekiko (plaza) lotura Larraitzerako bidearen azpitik egingo den tunel txiki baten bidez egingo da, bidea gurutzatzeak ekar ditzakeen arriskuak gutxituz.

Eraikitzen ari diren etxe berrien aurreko plazan **umeentzako parke bat eta komun publikoak eraikiko dituzte.**



Urtesabelgo obra

Estatu espainiarretik jasoriko diruaren bidez, Urtesabel auzoko urak banatzeko egitasmoa burutu da. Horrela, herri gunetik gertu dagoen auzo honetako ur guztiak banatu eta jasotzeko beharrari erantzun zaio. Bide batez, bertako bideak zuen egoera kaxkarrari ere erantzun zaio, eta bizilagunek egindako hainbat eskaera ere bideratu dira.



Goskindiko depositua berritzeko lanak

Aurrez aipatutako laguntza aprobetxatuz, Goskindiko ur depositu nagusiari ere berritu bat eman zaio. Zuen beharrari osotasunean erantzun ez bazaio ere, laguntza iritsi den heinean, gutxieneko egokitzapenak egin dira.





Kultura: zaindu, erein eta sustatu

Herriko tradizioak

Herrian bizirik dirauten ospakizunei eutsi egin behar zaie: Santa Fe festak, auzoetako festak (Saturdiko festak, Txamarretzeko festak, Aiestaran erreka auzoko festak...), San Isidro eguna, San Juan bezpera, herri kirolak antolatu...

Euskal identitatea indartzeko eta herriaren barne kohesioa sendotzeko helburuaz, irizpide aurrerazaletan oinarriturik eta egungo errealitateak eskatzen dituen egokitzapenak eginez.



Herri ekimena

Herri elkarteei eman behar zaie lehentasuna: euskal identitatea herrian sendotzeko bidean, herriko kultur elkarteak gune aktibo eta eraginkorrak izan daitezten, urteko aurrekontuetan partida egokiak bideratu dira. Halaber, urteko plangintzan eurei dagokien atalaren berri izateko harreman zuzena landu da beraiekin eta aurrerantzean ere horrela izan behar dela uste dugu. Horrela jakingo baitugu, hain zuzen ere, zein diren talde bakoitzaren indar-guneak eta ahuleziak.




Historia

Euskal Herriaren historiaren zati bat ezagutzera emateko, Euskal Herriaren bilakaera historikoa ezagutzeko ekimenak antolatu dira, hala nola: Gerra garaian fusilatutako hilobien erakusketa: "Hilotzak hobietatik atereaz, duintasunak berreskuratuz" Aranzadiren erakusketa jarri zen ikusgai iazko irailean antzokian.

Gai honi lotuz, hitzaldi bat ere eman zuten Aranzadiok, eta antzezlan bat ere antzeztu zuen Andoaingo talde batek.

Era berean, herriko zenbait elkarterekin batera antolatutako ekitaldi batean, garai batean garaia nola lantzen zen ere erakutsi zen dokumental baten eta hitzaldi baten bidez aurtengo martxoan.

Eta bide horretatik jarraitu behar dela uste dugu.



Musika eskola

Baziren urte batzuk musika eskolan zebiltzan zaldibitarrek han eta hemen sakabanatuta zebiltzala euren klaseak hartzen (batzuk kultur etxe zaharrean, beste batzuk antzokian...).

Horri irtenbidea eman nahian, eta ate bat baino gehiago jo ondoren, egokiena lehen liburutegia zegoen lekuan gela batzuk egin eta klase guztiak bertan ematea zela erabaki zen. Hori guztia, Eusko Jaurlaritzatik lortutako dirulaguntza bati esker egin ahal izan da.



Ludoteka

Hauexek dira esku artean izan ditugun beste 2 gai potolo. Haur eta gaztetxoekin lotuak dauden gaiak, hain zuzen ere.

Alde batetik, ez dugu uste, eta zenbait gurasok horrelaxe jakinarazi digute, gaur egun "Ludoteka" izenez ezagutzen dugun gelak dagoen eskaerari erantzuten dionik herrian.

Izan ere, gela bakarra izatean, bertan adin guztietako haurrak batera egoten dira, material guztia nahastuta eta adin bakoitzarentzat aproposak diren jostailuak, jokoak, margoak... bereizi gabe.

Horri irtenbide egokia emate aldera guraso eta talde ezberdinekin elkar lanean proiektu bat martxan jartzea da.

Proiektu horretan 0-3 urte bitarteko haurrak gela batean sartuko genituzke eta 4 urtetik aurrerakoak bestean. Dagoeneko bilerak eginak ditugu eskolako guraso elkarteko zenbait gurasorekin eta bigarren solairuko 2 gelak zerbitzu hau emateko egokitu, ardurak banatu eta proiektua behar den bezala abian jartzekotan gara.



Kirola

Urteko plangintzan eurei dagoen atalaren berri izateko harreman zuzena mantendu da kirol taldeekin. Horrela jakin dugu, hain zuzen ere, zein diren talde bakoitzaren indar-guneak eta ahuleziak. Ahaleginak egiten dira, herriko neska-mutilek euren gustuko kirola egiteko herrian bertan taldeak izan ditzaten (futbola, saski baloia...), kanpoko herrietara joan beharrik izan gabe.



Euskara

Udalaren Euskararen Udal Ordenantzari jarraipen zuzena egiten zaio. Lurraldetasunezko irizpidea ematen dio Zaldibiako Udalak euskararen erabilerari, euskara Zaldibiako udal jardueraren eta udalerriaren hizkuntza ofiziala bihurtuz. Udal ordenantzak dioena zorrotz bete behar dela uste dugu.



Etorkinen integrazioa sustatzeko, euskara ikasteko aukera eskaintzen zaie herrira etortzen diren etorkinei dirulaguntzak emanez eta aurrerantzean ere horrela egin beharko litzakeela uste dugu. Era berean, diruz laguntzen dira baita euskara lantzeko eta sakontzeko egiten diren ikastaroak ere. Era berean, kontuan izan behar dugu Zaldibiako Udala UEMA (Udalerrri Euskaldunen Mankomunitatea) elkartearen sartuta dagoela eta horrek bere zerbitzuak eskaintzen dizkiola udalari, hala nola, aholkularitza, langileak trebatzeko ikastaroak, inprimaki ereduak...

Kultura teknikariari laguntzaile bat jarri beharra

Denok dakigu gaur egunean dugun kultura teknikariak bere gain hartzen dituela liburutegiari, kulturari eta kirolari dagozkien lan guztiak. Eta horrek, zenbaitetan, gauza guztietara iristeko ezintasuna ekartzen diola.

Behin baino gehiagotan ikusi izan dugu hori eta laguntzaile baten beharra aldarrikatu ere bai. Hori horrela, egoeraren diagnosa egin ondoren, egun erdiko lana egingo lukeen laguntzaile bat jartzea ezinbestekoa dela ikusten dugu. Momentu honetan, pertsona hori kontratatzeak tramiteak egiten ari dira.



Gaztetxoentzako lokala

Gaztetxoek kasuan ere (11-15 urte bitarteko neska-mutillak), nabaria zen herrian hutsune bat genuela ume eta gazte artean dagoen tarte horretako herritarren aisialdirako. Eta horrelaxe adierazi zen zenbait gaztetxok eta gurasok egindako eskaeren bidez.

Horretarako lokal bat bideratu beharra ikusten bazen ere, bertan ez da horien eskariak betetzera bakarrik mugatu, dinamika horretan gurasoen lana, gaztetxoek euren lana (arauak jarri, ekintza ezberdinak antolatu...) bilatzea izan da jorratu dena.

Eta horrelaxe bideratu da egitasmoa, gurasoak eta neska-mutillak denak inplikatu. Azken batean, **Herrigintza lana, herritar guztion lana delako eta herri bizia nahi dugulako.**





Lan egiteko beste modu bat

Auzolana

Zerbitzu eta Ongizatearen esparruan premiak asko eta bitartekoak urri izan ohi direla ikasi genuen hasi orduko. Lanean hastearekin bat ohartu ginen hilerriak zuen egoera tamalgarriaz, gainera, aurreko udal taldeak lekuz aldatzeko izan zuen tentaldia medio, hainbat herritarrek hilerria auzolanean txukuntzeko proposamenari heldu genion.

Eguneroko jardunean ohartzen ez bagara ere, hilerria gure errealitatearen zati da. Maiz, gehien maite ditugunak agurtzen ditugun lekua edo zenbaitek bisitatu ere egiten duen tokia. Herritar batzuentzat amaiera irudikatzen du, beste batzuentzat hasiera, badira tarteko pausu bezala ulertzen dutenak ere. Era guztietara, errespetu eta duintasunez jantzi beharreko lekua, inondik ere.

AUZOLANA aukera, behar eta tresna modura hartuz, guztion artean hilerria eta inguruak txukundu eta duintasunez janztea lortu dugulakoan gaude. Bide beretik, aurrerago azalduko zaizuen moduan, hileta zibilak burutu ahal izateko udal ordenantza ere onartu dugu.

Biloreri irtenbidea

Zaldibiak une honetan duen beste arazoetako bat, eta ez txikiena, Bilore da.

Urte askotan zaldibitar askoren bizibide eta sostengu izan dena, orain lapurren kabi eta kutsaduraren gune bihurtu da.

Horri irtenbidea ematea zuzenean gure esku ez dagoen arren, ilbeltzaren bukaeran herrian zabaldu zen usainak eta keak beste urrats batzuk eman beharra adierazi zigun. Eta ondoren egin zen herri batzarrean segidan aipatzen diren erabakiak hartu ziren, besteak beste: sinadura biltzea, prentsara oharrak bidaltzea, kontzentrazioak egitea Bilore aurrean...

Ekintza horietako asko burutu dira dagoeneko, baina aurrerantzean ere administrazioari presio egiten jarraitu beharko gatzaizkio, bilerak eskatu, **bildutako 680 sinadurak** eraman, ... **ea zerbait egiten duten, gutxienez eraikuntza bota eta kutsadura garbitu.**



Kaleko urbanizazioa

Oso agerikoa izaten ari da kaleko urbanizazioa egin zenean ez zirela gauzak behar bezala egin.

Ur putzu handiak sortzen dira bide eta espaloietan, eta horrez gain, autobusaren joan etorriak direla medio, plaza inguruan behin baino gehiagotan zorua egokitu behar izan da. Baita Albitxerri inguruan ere, bertako espaloia altxa eta berriz jarri behar izan baita.

Horrez gain, dagoeneko aurreikusten da hainbat lekutan arazoak izango direla, Kanpaindegia atzeko bidean, esate baterako.



Argi sarea

Buruhauste ugari izan dira argi sare publikoaren inguruan. Albistegietan entzuten ziren arazoak herriraino iritsi dira. Azken garaietan kobre lapurretak zabaldu egin dira eta gure herria ez da libratu.

Aiestaran erreka auzoko argiek eta parke botanikoan daudenek behin baino gehiagotan jasan dituzte lapurreta horiek. Esate baterako, parke botanikoan lau aldiz konpondu da argi sarea eta konpondu den bakoitzean handik astebetera berriro saiatu dira lapurtzen, azkenengoan kobreak ordez aluminioa topatu dutenez bertan utzi dute. Lapurreten arazoarekin batera bestelako arazoak ere izan dira. Ezezagun batzuek, parke botanikoko argiteria guztia txikitu baitzuten jarri zen egun berean, herriko jaien hasieran. Horren ondorioz, hilabete luzez ez da argirik izan, eta esan beharrik ere ez dago, horrek izugarritzko koste ekonomikoa suposatu diola Zaldibiako herriari.



Garbiketako makina

Kale garbiketa egiteko aurreko udal taldeak erosiriko makina gordetzeko lekurik ez eta garaje partikular batean zegoen gordeta eta geldi. Aurreko udal arduradunek ez zuten langileekin kontatu 60.000 euroko makina berria erosterakoan, ezta egin behar zuten lana egiteko tokirik izango ote zuten ere. Zaldibiako espaloi gehienetan lan egiterik ez duen makina erosi zuten eta gainera, bera non gorde ez zegoelako obrak egin behar izan ziren plazako biltegian.



Autoaren erabilera zuzentzen

Autoaren erabilera zuzentzeko kanpaina. Ez da berria autoen erabilerak sortzen dituen arazoen gaia. Baina, behingoz gaiari adarretatik heldu eta sentsibilizazio kanpaina bat jarri zen martxan.

Gai hau ez da egun batetik bestera konpontzen, heziketa kontua da eta horrek, lan iraunkorra eskatzen du. Hori horrela, sentsibilizazioa eta neurri zuzentzaile lanak beteko zituzten pibotak jarri dira herrian zehar. Oraindik bide luzea dugu egiteko, baina guztion artean lortuko dugulakoan gaude.

Eskolako eremua autorik gabe. Oinezkoari lehentasuna emate aldera, autoek jandako eremuak berreskuratzen saiatu da pixkanaka. Plazaz inguruaren antzera, Lardizabal herri eskolako ingurua ere oinezkoentzako eremu bezala babestu da.

Plaza azkenean autorik gabe. Nahi baino gehiago luzatu bazen ere, azkenean plazarekin zegoen zorra kitatu zen. Orain, Albitxerri atzetik bideratzen da ibilgailuen joan etorria.

Zamalanetarako gunea. Gaur gaurkoz zeregin horretarako izendatuta dago goiko okindegi aurreko aparkalekua.

Balorazio fasean badago ere, maiz bere funtzioa bete ezinik geratzen da, izan ere, zenbaitek bere auto edo furgoneta aparkatzeko erabiltzen du, eta horrek oztopatu egiten du zamalanetarako aukera. Plazan, berriz, autobus geltokia erabiltzen da zamalanetarako, gune hori erabat arinduko da goiko kaleko autobus geltokia egiten denean, autobusak bertan itxarongo baitu.



Kontsumitzaileen arretarako bulegoa

Kontsumitzaileen arretarako bulegoa herrian: Hainbat urtez ordaindu izan da zerbitzu hori, eta azkenean lortu da zerbitzua hilean behin Zaldibian izatea. Zehazki, hileko lehen asteartean eskaintzen da zerbitzua udaletxeko 2. solairuan.

Zaborra eta hondakinak

Esparru honetan bide luzea dugu egiteko. Jakingo duzuen bezala, Usurbilen, Hernanin eta Oiartzunen, besteak beste, abian jarri dute hondakinak atez ate biltzeko sistema. Laster, Arrasate, Aretxabaleta eta inguruko herriak ere jauzia ematekoak dira. Goierrin urrun gaude oraindik, baina bidea egiten hasiak gara eta pausu batzuk emanak ditugu. Entzungo zenuten, Sasietan 5. edukiontzia jartzeko egitasmoa onartu zenean, Goierriko 7 alkatek eta 51 zinegotzik gaur egunean zaborra biltzeko dauden sistema ezberdinen inguruko azterketa bat eskatu ziotela Sasieta Mankomunitateari. Zergatik eskaera? Bada, inolako azterketarik egin gabe jarri nahi dutelako 5. edukiontzia Goierriko herri guztietan, eta gaur **egunean badira 5. edukiontziarenak baino emaitza hobeak ematen dituzten zaborra biltzeko sistemak**; Atez ateko sistema, adibidez. Azkenean, Sasieta Mankomunitateak **azterketa independente bat egitea erabaki du bilketa sistemen inguruan**, eta horren arabera erabaki behar da zein den bilketa sistema egokiena. Zaldibian argi dugu **burugabekeria dela gaur egun bilketa sistema bat txertatzea inolako azterketarik egin gabe**. Horregatik, eta azterketa esku artean izan arte ez da egungo sisteman dirurik eta esfortzurik gastatuko. Esfortzu eta saiakera askoren buruan lortu da Saturdiko bidegurutze inguruari zabortege itxura kentzea, eta baita Biloreko sarrera atontzea ere (atez kanpokoa, noski). Egin beharreko bidearen luzera norainokoa den erakusten digute horrelako errealitateek. Hala ere, eta egungo bilketa hobetze aldera, lehen pausoak eman dira. **Birziklatzeko hiru gune berri jarri dira**, Ibaiondon, Txapeletxen eta Tejerian. Gainera, laugarren bat ere aurreikusten dugu herri sarreran, Elbarrena auzoko errotonda inguruan, alegia.



Posta zerbitzua hobetzeko

Aspaldiko arazoa bazen ere, Correos-ek helbidea zuzen ez zuten eskutitz guztiak bueltan bidaltzeko agindua eman izanak gauzak okertu zituen.

Arazoak eta nahasmenduak sortu izan dira urte luzez betiko postariaren oporraldi edo eta gaixoaldietan. Zergatik? Maiz eskutitzen helbideak ez zetozelako bat Correos-eko eta udaleko helbideekin.

Hori horrela, etxeetako zenbakiak banatu ziren, eskutitz bat ere bidali zen herritarrei euren akatsak zuzentzearen garrantziaz ohartaraziz eta maila handi batean, normaltasunez lan egiten du posta zerbitzuak gaur egun.

Horrez gain, larrialdietako anbulantziek etxeetako zenbakiak izaten dituzte erreferentzi gehienetan, eta zenbaki horiek modu ikusgarrian jartzeak horrelako kasuetan ere lagunduko du.





Emakume eta gizonen arteko berdintasunerako plana



Udal Gobernu taldea osatzen duten kideen artean, badaude Zaldibiako Emakume eta Gizonen arteko Berdintasunaren gaia lehentasunezkoa dela irizten dutenak. Kide hauek maila pertsonalean eta bakoitza bere esparrutik saiatu dira gaia lantzen, baina egindako lana sistematizatzeko beharra ikusi dute.

Lanaren antolatzea da prozesu honen lehendabiziko pausoa, Berdintasun Diagnostiko honen bitartez, Zaldibiako **emakume eta gizonen egoeraren inguruko ezagutza sakona lortzea da**. Diagnostikoari esker identifikatu dira herrian berdintasuna lortzeko behar gehien duten esparruak, honela indarrak esparru hauetara bideratuz.

Bestalde, Diagnostikoa egiteko prozesua bera erabili nahi da herriko alderdi politikoetako kideak, udal langileak eta bestelako eragileak (elkarteak, gazte taldeak, eta abar.) berdintasun gaietara hurbildu eta sentsibilizatzeko.

Zaldibiako Emakume eta Gizonen Diagnostikoaren helburu orokorra herriko gizon eta emakumeen errealitatearen ezagutza sakona lortzea da, euren arazoak identifikatu eta gizon-emakumeen berdintasunean aurrera egiteko oinarritzekoak diren esku-hartze eremuak definitzea. Bide batez, diagnostikoa egiteko prozesu bera gaiaren inguruan oinarritzeko prestakuntza bat emateko eta parte hartzaile guztiak sentsibilizatzeko baliatu nahi da.

Helburu orokor hauek lortzeko ezinbestekoa da jarraian aipatzen diren helburu zehatzak betetzea:

- Eremu ezberdinetan (lan munduan, kulturean, osasunean, politikan, kirolan, gizarte gaietan, eta abar.) Zaldibiako emakume eta gizonen artean egon litezkeen ezberdintasunak identifikatzea eta emakumeak ahalduztzeko oztupoak eta indar-guneak zehaztea.
- Udal baliabide eta zerbitzuen erabilpenean, dirulaguntzak, azpiegitura publikoak (kultura-etxea, liburutegia, kirol instalazioak, etab.) gizon-emakumeen artean dauden ezberdintasunak zehaztea eta oinarrian dauden arrazoiengan sakontzea.
- **Emakume eta gizonen ardura eta inplikazio mailak aztertzea** etxeko lanen banaketan, aisialdirako denboraren erabileran, zaintza lanetan, eta abarretan.
- **Emakumeen aurkako indarkeriaren fenomenoak** Zaldibian duen nolakotasuna ezagutzea.
- **Udaleko langileek berdintasun gaien inguruan duten ezagutza eta sentsibilizazio maila ezagutzea**, haien zereginetan genero ikuspegia txertatzeko dituzten aukerak eta zailtasunak jasotzea.

Herriko eragile politiko, talde, elkarte eta abarrek berdintasun **gaien inguruan duten ezagutza eta konpromiso maila ezagutzea eta haiekin lan egiteko ildoak identifikatzea.**



Duintasunak ez du preziorik

Azken urteetako beherakada ekonomikoa eta krisia direla medio, behar sozialak, pobrezia eta gizarte bazterketa ia bikoiztu egin dira euskal jendartean: gaur egunean 178.000tik gora herritar bizi dira, langabezian Hego Euskal Herrian, gizartetik baztertuak eta bizirauteko baliabiderik gabe; beste batzuek, areago, iraun egiten dute, miseriazko pentsioak jasotzen baitituzte.

Gero eta murrizketa handiagoarekin inposatzen zaigu politika soziala. Laguntzak murriztu arren, **Zaldibian laguntza eta zerbitzuei eusteko apustua egin da.**

Horretarako, laguntza sozialetarako bideratzen duen dirua handituz joango da, ezinbestean. Horren erakusle dira herrian lehen eskutik eskaintzen diren hainbat zerbitzu:

Etkez etxeko laguntza:

Zaldibiako Udalak zuzenean kudeatzen du etkez etxeko laguntza. Eguneroko oinarritzko zereginak euren kasa burutzeko arazoak dituzten pertsona edo familiei zuzendua dago eta zaldibiarron bizi-kalitatea hobetzea du helburu. Zerbitzu publikoa da eta zuzenean kudeatzen da udaleko gizarte arlotik.

Gizarte langile berria:

Jakinaren gainean egongo zarete dagoeneko, hainbat herrirekin batera elkar banatzen dugula gizarte teknikaria (Itsasondo, Legorreta, Gaintza, ...). Une honetan, ordea, eta esparru honetan azken urteetan pilatu den lan karga dela eta, dauden baliabideekin ezin zaio behar bezalako erantzuna eman eskaerari. Hori horrela, bigarren teknikari bat kontratatuko da zerbitzua hobetu eta aspaldi hartu zen erabakia gauzatzeko asmoz.

Hileta zibilak egiteko arautegia

Hileta zibilak egin ahal izateko arautegia onartu da. Zaldibiako gizarte zibila osatzen duten familieek, adiskideek, erakundeek edo taldeek beren hildakoak omentzeko edo horiek agurtzeko egin nahi dituzten ekitaldiak baimentzeko arauak jaso dituen ordenantza abian da, hala, pertsona horien ekarpenak edo balio etikoak edota gizatiarrak onartzeko.

Gaur egungo gizartean ezinbestekoa da hildakoen aldeko hileta edo agur zibilak egiteko aukera ematea, erlijiorik gabe bizitzea aukeratu dutenen omenez halako ospakizun duin nahiz pertsonala egin ahal izateko, zenduaren bizitza ikuskeraren arabera ekitaldiak antolatzeko, alegia. Beraz, gure gizarteko erlijio guztien jarraitzaileek hildakoak omentzeko ospakizun liturgikoak antolatzeko tokiak edo tenpluak dituzten era berean, Zaldibiako gizartean gero eta eskaera handiagoa duen behar sozialari erantzun behar dio.





Arkaka, herri-bide eta ganadu larrealdien inguruan

Uraren interpretazio guneari dagokionez, bisita eskaera egin dutenei gunea erakusteko

bideak jarri zaizkie, baina puntu honetatik haratago garbi dago herriak dituen bitartekoekin ezinezkoa dela proiektua aurrera eramatea. Era berean, eta horrela nahiko luketen herritarrei begira, aurrez horretan aritutako Gaztelu Elkarteko kideekin harremanetan jarri ondoren, Arrantza Eskola martxan jartzen saiatu da. Horiek, ordea, tokiak herritarren aldetik izan duen erantzun falta nabarmena azpimarratu ziguten eta beraz, Zentraleko putzua ahalik eta txukunen mantentzera mugatu da, Arrantza eskolarik gabe.

Herri bideen berreskuratze plana martxan da. Garbi dago, asko galduak direla eta herri-bide guztiak sailkatzea ezinezko lana dela, baina aurrera eraman da auzo edo herri-bailara bakoitzeko aukeraketatxo bat. Oso lan interesgarria da eta aurrera begira, herritarren elkarlanarekin, herriarenak diren bide eta ibilbide sarea osatzea da helburua.

Tejeriko Goizane eraikinari dagokionez, herrian antzematen genuen informazio faltaren aurrean, Goimeneko kideekin harremanetan jarri eta 2010-6-26/27an, Zaldibiako herritarrei zor zitzaien Goizaneren aurkezpen inaugurazioa egin zen.

Proiektu honen xedea Gipuzkoako nekazaritza ekimen desberdinak sustatzea eta sendotzea da, beste sektore ekonomikoekin elkar uztartuz. Goizanek, horretarako oinarritzko logistika, ekonomia eta kudeaketarako baldintzak erraztea du helburu.

Orain arte, ahuntz, erlezaintza, konposta eta haragi behiei buruzko ikastaroak antolatu dira bertan, baita EHNERen urteko batzarra ere.

Herri bideei lotura. Zaldibiatik Tejerira bitarteko herri bidea bide gorri bihurtzeko azterketa bat egin da, hasiera batean herri gunetik, Benta berri edo Otseitza baserriraino iritsiko dena.

Martxoaren bukaeran, **Gaztelu inguruko herri lurretan,** aurrez diputazioarekin adostuta zegoen mendi garbiketa martxan jarri da. Bestalde, lur horietan abereak edukitzea tokatzen ez zaienen aurrean zaintza areagotuko du Foru Aldundiak.

Gazteluko pistaren erabileraren inguruan, berriz, Mankomunitateko araudia hartu da eredutzat, hori horrela, eta araudi horren arabera, tokatzen zaienei bakarrik emango zaie bertan ibiltzeko aukera. Horiek, autoan eraman beharko dute banatuko zaien BAIMENDU txartela.

Kasu berezietarako, BAIMENDU BEREZIA txartela eskuragarri izango da, horretarako bete behar den eskaera udalean beteta. ○





Duela urte betetik Itsasondan dauden antzeko makinak jarriko dira Zaldibian ere.

Esku artean

ne honetan herrian dauden haur parkeen egoera kaxkarra dela medio eta kirol


azpiegiturek duten berritu beharra ikusita, herriko indar eta inbertsioak eginkizun horretara bideratzea baloratzen da.

Erein programan proiektu bat aurkeztu eta dirulaguntza lortu da. Zehazki %40ko finantziazioa oinarri izango duen dirulaguntza.



Laguntza horri esker, (udalak %60a jarrita, noski) ondorengo berrikuntza eta egokitzapenak egitea onartu du aipaturiko programak:

- Olaldeko parke inguruan eta herriko plazan haur parke berriak jarriko dira.
- Futbito zelaian hainbat berrikuntza egingo dira: atezaindegia eta saskibaloitresneria berritu, inguruko sarea berritu, belar artifizialezko zorua jarri (arautegiak eskatzen duen modukoa)...
- Olaldeko parkean zehar haurrak ez garen baina bide horretan goazen jendearentzako, kirola eta gorputz lanketa egiteko baliagarri izango diren instalazioak jarriko dira.



Aberriaren eguna 2011, argi berdea independentziari!



2011ko apirilaren 24an ospatuko dugu Aberriaren eguna. Aurtan ere bada INDEPENDENTISTAK sareak egin duen deialdi nagusi bat.

GERNIKA eta BAIGORRIIn ospatuko da aurtengo Aberriaren eguna. Gernikan egun osoko ospakizun eta egitaraua antolatuko da espresuki. Baigorriin aldiz, Nafarroaren egunarekin bat egiten duenez, bi aldarrikapenak batu eta ekitaldi bateratua egingo da egitarauaren baitan.

Aberriaren eguneko ospakizunetan parte hartze-
ra deitzen zaituztegu, eta nola ez, urtero bezala
**IKURRIÑA ETXEKO BALKOIAN ZINTZILIKATZE-
KO DEIA EGITEN DUGU!**